


陝西通志




第八十九卷

藝文五

賦下

DS
793
S4555
1735
v.89



陝西通志第八十九卷

藝文五 賦下

渭水貫都賦

唐 衛次公

清渭天鑿名都王制貫金城千里之域瀉銀河九霄之勢同穴發源
衆川潛泄分黑水以渺漫遶黃山而迢遞水北濟物用導於中州君
德配天故法於上帝都之會也皇皇渭之流也湯湯異東西之漚澗
非汲引之沮漳夏后濬川分流非肇於伯禹余德主水貫都必因於
始皇照雙鳳之丹闕架長虹之飛梁褰裳者不勞於揭厲濯纓者何
必於滄浪泛彼樓船掩橫汾於武帝濱之釣叟感入兆於文王且夫
前王酌憲惟皇都之所建度地有孚因貫渭之上腴曲抱乎周原秦
野旁臨乎八達九衢旣流衍以紅粟誠輝煥乎黃圖則知八水皆流
豈清於渭水五都並制莫大於西都原夫渭者雍之巨浸都者人之

所聚天垂法君必取曳雲間之清渭河殊雲漢移天上之紫宮洞開
天府及乎縈流一帶中派紆餘蕩元氣澄大虛稽前典而備矣於名
川而舍諸豈惟積潤於庶物固亦近壯於皇居至乃春景澄廓晴霞
朗暢涵萬象於影中度牽牛於波上客有觀光者於茲而寫望美夫
取法可仰因天垂象疏紫陌而逶迤流丹霞而蕩漾周公卜洛雖云
風雨所交秦后貫都實謂膏腴之壤惟洪業之永固與渭流而彌廣

登吳嶽賦

周鍼

吾嘗文戰將北羈遊極西覩吳嶽之孤峭計羣山之莫齊由是邈崖
谷遂攀躋入雲靄出沉泥既臻頂上用視天倪鴈塞殊小峨嵋甚低
蓋以氣壯神扶雄標國祚揖白帝兮不見抱皇城而自固嵐光擁翠
拓開霄漢之心岫色橫空鎖斷東來之路巒嶂旁竦岩堯上千碧草
春含清風夏寒遙瞻魏闕迥立煙巒疑起洞府謂在天壇中隱深溪

日月之光不到外連層阜龍蛇之勢斯蟠當其區宇正寧氛埃初見
覽造化之宏制識乾坤之設險汧水縈盤而線走隴山列巍而螺掩
西窺劒閣霜地表之千鐔東瞰蓬萊黛波間之數點遐徵衆嶽式並
隆崇彼皆受封於百代此獨不視於三公森筭立以削成寧慚太華
黯雲凝而化出豈讓維嵩况乎萬仞凌虛千里倒影虎踞華裔鯨吞
遐境壘巘攢壁迴巖列屏捍絕域以增隘固中原之堪永直使以禮
賓九有仁服八荒臂賢以爲輔弼宅道以爲封疆亦須假我嚴衛憑
我巨防靜藩垣於都邑遠隔闕於氏羗吾唐重其功崇其鎮爰升成
德之號用補極天之峻小儒是以竟日興感抽毫賦韻登詠畢兮嶽
岑指長安而後進

巨靈擘太華賦

關圖

泰華崔嵬伊巨靈兮其壯哉挺高掌以遐舉擘孤峰而洞開功倖造

化勢越風雷劃千仞之巖巒屹從地裂決九河之波浪杳自天來昔
者混茫是生磅礴惟神無朕配天有作念波流之未通顧茲山之可
却將以闢迢遞正嶄鑿恆心而再定川原應手而別開林壑靈異將
伸雄稜益振蓄怒轟轟注情嶙峋謂釣鰲不足以駭人鞭石不足以
騁神指揮而壘嶂知改盼睽而三峯可新然後攘臂効能端身任力
捫蒼藹於天半折翠微於月側若百神將萃而潛助二儀欲判而未
息嵐光兩向幽連松柏之聲黛影中開已斷雲霞之色豈不以閼形
幽默拓跡巍峩致用而扶持天地成功而變化山河分積翠於空中
千年軋塊啟通津於指下萬里騰波豁丹崖天阻呀峭壁而相距
勢且異於兩傷力自弘於一舉截仙子幽棲之洞壯王者建都之所
蓋以神開壽域靈固人寰廓峻極於倏忽標明成而險難越大禹之
水小愚公之移山竹箭波中路竟深於導蓮花峯外跡終寄於

躋攀是知事關杳冥理歸幻與石有時而分裂水有時而疏導信乎載物者之使然非人情之所到

涇渭合流賦

獨孤綬

感異源而合趣指涇渭於秦樹涇如經也自北而南流渭若緯焉從西而東注性相近以不息勢使然而自遇湜湜其汴昔旣聞之於詩湯湯其流今則狀之爲賦夫至清者渭至濁者涇惟清也鑒物之道著惟濁也含垢之義形共導金氣咸通并星混殊流之昭晰成一帶之滌滄初以縱亂橫似爭長而難雜終以潔受污何極睽而乃合禹功之所兩存漢苑斯焉博納乍異其色覺游鱗之隱見必同乎聲帶長風之蕭颭象昭回之可求歌鄭白之有由飲馬投錢足以發明廉士決渠降雨足以殷富神州旣相弘以利物寧自異乎並流知之者齊我以不皦不昧感之者比我於一薰一蕕斯乃柔以長存和之足

貴近則順洪河之紆直遠則成滄海之濩渭同功一體叶靈通氣信殊穀洛之流寧爽淄澠之味夫然波獨清而無偶非達識之所謂

御註孝經臺賦

張普

孝惟行先教實理本故元宗採宣尼之旨爲聖理之閫爰索隱以鈎深或詞約而意遠然後勒睿旨於他山之石樹崇臺爲儒林之苑天文煥發知孝道之克宣微旨高懸示仁風之已返上崇君德下達人情王猷玉潤帝典金清誼雖刑於子道理實暢乎家聲施之於人風俗可移於孝理懸之於教日月方比於貞明不然何以倬爾孤標介然守正金字累累以條貫銀鈎歷歷而交映故嚮之者修睦就之者起敬斯乃示生民之大端仰高山之景行至哉聖化本本元元酌其旨而薄俗可厚毗於政而理道可敦故政以肅教爲尊非無詩書始務陳其行本非無貴賤心願宗其化源且高而不危者尚乎臺磨而

不磷者莫如石揭貞質於庠序殊秘府之竹帛諒乃侔天地而始終
豈特垂載祀於千百靜而繹思文固在茲一人有作比屋允釐覽君
君臣臣之間則心乎愛矣於尊尊卑卑之道則學而知之矧乎雕琢
成章區分式序方隅而不失其正篇次而各得其所三千子之鼓篋
邈矣具瞻十八章之箴規揭之備舉乃知孝理馨香有時而彰不壞
不朽化被無疆所以播鴻休於玉葉表嗣子於明王故曰孝者天之
經也宜乎配地久而天長

駕幸九成宮賦

李子卿

皇帝握靈符之三載也天地穆清星日耀潤野訪遺逸朝登傑雋化
則垂拱而成令則不言而信時巡之儀展秋獮之禮順思訪俗而觀
人若乘乾而出震右輔伊邇離宮在茲前瞻鳴鳳之岫傍指神鷄之
祠渭水烟波接苑中之洲渚岐山雲物落禁裡之軒墀俄而迴鑾輅

載羽旗爲宴鑄之樂動橫汾之詞況不勞於百姓而有務於三時者
哉由是叶清秋揀吉日乘石洗皇輿出七驕按隊千乘扈蹕戈矛林
森士馬櫛比始地業而天旋終電馳而飈疾翻然而八駿賽騰霍獲
而六龍奔逸雷公轉轂風伯按馭朱旗列而秋野生春金甲照而暮
川增曙陋漢帝之遊行哂秦皇之逸豫祥煙不散近飛槍壘之間瑞
草常開併拂車宮之處廣陌鳴鑾異彼遊盤訪百年之疾苦知五稼
之艱難成王之蒐田是問古公之政有以觀翠華來兮野老喜屬車
至今國人歡詎比夫隴塞回中妄開行幸之路泰郊時上虛立禮神
之壇穆然深宮駐蹕其中樓枕嶺而倒影殿當川而抱虹閼邃而寒
暑隔岩堯而雲霧通前視八水傍臨九巘所以明四目達四聰凝睿
想播元風比遊心於汗漫侔得道於崆峒亦旣下輦於是端冕補闕
政修墜典大風之歌作湛露之恩展於是振旅建旄迴鑾返轡百蠻

惟威武萬姓知教義若臣者巖穴久服邱園來賁未有燭於皇明竊以觀於人瑞敢獻揚雄之賦庶獲有司之議

按地業宜作地吸

三良塚賦

并序

劉禹錫

魯文公六年秦伯任好卒以子車氏之三子奄息仲行鍼虎爲殉皆秦之良也國人哀之爲之賦黃鳥君子曰秦穆之不爲盟主也宜哉先王遠世猶貽之法而况奪之善人乎是以知秦之不復東征也秋季月吾西遊汧渭出於岐雍之間於古道傍得三良塚心甚哀之涕泗者久之而去詞曰

昨宿岐城曉涉渭東霜凌雪結飛沙亂蓬中野躊躇屆此古墟野人曰卽車氏之塚方驅駕班如久而咤曰吾嘗讀舊史矣古者秦氏大於穆公出師則寧東夏用賢則霸西戎大邦服其禮小邦畏其雄謀已集戰亦武不能勤王不爲盟主者何居以滅天之良喪人之特百

夫何系一朝而路可哀也哉宛其三子遭時迍邐主已卽世身皆靡
全指冥芒而爲期撫昭世而坐捐方惴惴以臨穴且哀哀而號天從
有言於寒原莽蕩千里迴眺無垠上刺哀德下傷幽魂挂驂隴樹脫
劍山門掇野芳以爲薦汲行潦而充罇矧今情之猶悲諒古恨之潛
吞死而不作吾誰與言代事浩漉人壽爾天言念君子中心悄悄哀
生人之長慟赴永夕之莫曉歸去來兮不可留且悲吟於黃鳥

華清宮望幸賦

李程

上苑之左兮驪山之中天作高岫帝爲離宮示宸遊之有所表聖鑒
於無窮臨峻路而赫其眈眈標爽塏而屹以崇崇惜翠華之未至闐
紫殿而猶空則有望幸其中流睇延幕希天顏而迴矚望雲闕而屢
顧想息波之東注俯瞰渭流愛佳氣之西浮空瞻秦樹目盡煙末心
馳御路何聖慮之未還獨幽懷而能喻窮轍跡且俟玉山之遊想車

音將購長門之賦矧夫閣有朝元之美稱殿有長生之嘉名霞駁丹
檻雲攢萬綉可以召通仙之降止安皇祥之永貞是以仰碧空竭丹
誠庶日月之迴照等葵藿而同傾濯感沸之泉每想金輿之度踐萋
青之草還思玉輦之行雖託質於別館常寄心於穆清戀戀西向悠
悠躊躇步磴道以寂歷眄廣庭以寥曠竹花雖吐如含待鳳之誠雲
氣纔升若覩從龍之狀彼玉山旣遠金闕仍賒未若浮遊近縣如在
仙家俄天邑之孔邇自神都而不遐雖館稱五柞殿美九華諭之於
此曾何以加惜乎神光未矚曠此佳境徒企想以忡忡復懷慕而耿
耿閉玉樹於深谷銷金鋪於秀嶺君乎君乎胡不出宸居而來幸

華山爲城賦

陳諷

地控強秦路惟分陝有太華之作固若崇墉之生險絕壑中抱重巒
外掩倚雲漢而匝野屏開跨金方而當空黛染千尋壁立萬雉雲屯

龍盤日月虎視乾坤大河自北而東呀爲濬洫窮谷從中而斷豁若
重門誠百二之光宅見九五之天尊偉夫襟帶皇都咽喉上國磅礴
乎壻函之外隱軫乎豐鎬之側所以羅羣象吞八極展萬祀而成在
衆心冠三秦而位居一德況乎天地初霽雲霞四披紅塵滅影碧落
標奇宿霧市之氣尚疑烟闕聳蓮峯之色不讓文陣顧萬夫之莫向
信六國而奚爲岌岌神才言言天設連岸抱九州之路壯氣折諸侯
之節蕭蕭歸馬想飲窟之初還隱隱輕雷訝鳴鼓之不歇天包地束
鳥過雲輕萬仞垂峭千峯八冥髣髴虹蜺盡識旌旗之色依稀星月
皆分弧矢之形疑其發跡混茫孕茲重阻假巨靈拔山之力衛王者
登龍之所不然安得不費一錢不勤一旅削成而千里共峻作鎮而
一人可禦是宜堯爲君而舜爲臣道爲主而德爲隣與天地之人共
守使海內之士咸賓

潼關賦

張翊

惟皇王之建國分中外於上京憑山河以作固闕華夷而騰聲誠曰
咥猴吞八荒而則大是稱巖險控萬國以來平周有掌貨之節禮無
關門之征巨防宵扃倚洪波而作鎮重扉擊拆連太華而爲城荆中
代之新號憂函谷之舊名柱史老聃擁仙雲而西邁終軍童子建使
節而東行文伯不仁廢六關而興誚王元有說封一丸而永清若用
備不虞取諸繫氣作邦畿之襟帶杜奸宄之來往長空矗兮雲屯層
樓赫以霞敞登臨者有知其地雄踰越者無漏於天網亦有孟嘗奔
走長青未嘗何三馬之不談學雞鳴而乃去逢尉臣之一失或愚者
之千慮至如楚漢爭雄沛公先入旗鼓照耀兵戈翕習南面則三傑
齊驅東井則五星俱集實靈命之所應亦人謀而是及王道廓而已
清帝業魏乎乃立窮四塞之艱阻成百王之都邑故知建功定霸期

乎此關武侯矜於固險婁敬說乎河山視前列之軌躅覽陳跡而躋攀既登高而能賦希駟馬以言還

武關賦

王啟

路入南山中橫武關呀重門於固護屹峭壁以孱顏昔在危時屯千夫而莫守今當聖日置一卒以常閑觀乎地勢爭雄山形互對西連蜀漢之險北接崤函之塞世亂則阨限區宇時清則通流外內當其六國連謀關防日修則斯地也雲屯貔武雪耀戈矛張儀出以行詐懷王入而竟留縱下客之鷄鳴將開莫可任公孫之馬白欲度無由及乎壁起九州波搖四海秦鹿失而襟帶難保漢龍興而山河遽改豈料禦侮之所此日全平未知擊拆之徒當時安在所謂以兵而備者其之能守以道而居者莫得而踰千里之金城湯池終爲漢有二世之士崩魚爛自是秦無今則要害何虞乎隆已久雖設險以猶在

顧戒嚴而則否蕭條古壘豈臧文之廢來寂寞空扉似楊樸之移後
蓋以文修武偃國泰時雍濬四溟而作塹廓八極以爲墉遂使鼙鼓
無喧一水之寒聲泱泱旌旗常卷千載之暮色重重嗟乎昔爲洪樞
今成隙地信無外以斯見實善開之攸致儒有經其所惑其事乃曰
今朝西去豈無隨老氏之人他日東還誰是識終軍之吏

西都賦

李庾

洛汭先生客於上京問里人以秦漢咸陽故事里人曰先生不習乎
哉秦址薪矣漢址蕪矣西去一舍鞠爲墟矣代遠時移作新都矣先
生曰賓者不識藐然老沈懵歲亡而日遠願聞古而知今爲我源說
恭承玉音里人曰昔者帝兆唐居命隋先基乃假隋權是開中原旣
權二年爲唐遷都周秦莽平蕪枿餘文驅煬迎卒於侑傳若天使
項氏死勞而授漢休也唐開禮壇新都之門闢殿乾宮以朝諸侯時

則有若房魏作弼英鄂執律南陽故人河間帝室戎衣旣脫瑞氣洋溢謹聲傳於億兆煬燎致乎太乙乃會漢酺發周賚謚萬類淳四海遂開國以報功差子男之五等然後構閣圖形榮號凌煙指河帶以山礪書天子之縉紳其制度也擁乾體正坤儀平兩曜據北辰斥咸陽而會龍首右社稷而左宗廟宣達周衢址以十二棊張府寺局以百吏環以文昌二十四署六部提統按星分度儼憲臺而四列肅陰宮於北戶建倍員於前王總綱維於御史端國儀朝實周察乎左右其內則有太極承端通址含元日出東榮月沉西軒倚九巘之下麓涵太液之清瀾龍道雙迴鳳門五開煙籠凝碧風靜蓬萊東則左閣當辰延英耽耽宣徽洞達溫室隅南接以重離繇乎少陽是爲二宮複道逕廊西則月華重啓銀臺內向中書在焉密用宰相宦者別省延緣右藏建子亭於屏外設蘭綺於廡下天子端朝明庭九賓發少

府之冕旒陳奉常之官勲肅勾陳以辟護翼雉扇而對分鷄人乃下
鳴鶴先聞千官就日萬品趨雲漏遲遲而東轉風習習而南薰外則
國子招徒疏館開軒左立太學前惇廣文膳豐中厨就教九年稽以
博士總之成均秘書典籍品命校郎橫閣三重闡正鈇黃若六藝之
條貫百氏之縱橫交錯發論禮形而樂聲太傅在前少傅在後載言
載筆出納謨誥鵠動鸞飛振玉鏘金殷廟羞瑚璉之器楚材產杞梓
之林已而燮和陰陽經緯天地採撫軒昊牢籠虞夏闢孔子之學堂
敷一代之風雅此王者之文教也親兵百萬制以神策紫身豹首金
腰火額獵霞張旆剝犀綴革奮目而虎眦振須而蝟磔柔六鈞貫七
札對天仗以司戈分玉墀而執戟別有陳旌賜鉞閩外四七依榆關
以作鎮距柳營而開壁逐寇則出塞飛塵伐叛則救陽作澤此王者
之武威也唐禮旣行三代同風徵叔孫之春官命伯夷之秩宗則有

封禪巡狩謁天拜祖明堂辟雍王者之事有司勿失次有朝廷之位
班爵之序器服車馬以節文武不僭不濫群臣之事有司以告下有
內族外姻以殺以隆五禮各殊陳吉儀凶一室是形天下大同百姓
之事有司以教故以內則敬以外則嚴以家則肥以國則昌卿士翼
翼公侯皇皇在野熙熙在朝蹒蹒夫如是夸周而正魯胡可殫詳洎
乎樂之設也以德配樂陳器以作革木匏竹篪簫磬鎛命官二署諧
以協律以奏廟貌祖考來格以陳宮庭簫韶九成鳳凰來儀以布天
下手之舞之足之蹈之及乎御引衣集舞童或獻凱作名以宣帝功
或布字綴行以達皇風此禮經之所未紀夔憂之所不同刑期無刑
以辟止辟三章寘漢祖之德四赦緩穆王之法於是天子御端門詔
天下渙汗發澤與民更始建金雞於仗內聳修竿而揭起其下則稅
三關解銀鐙追共工徒驪兜煦舜絃浹堯年臺收白簡吏閣丹筆總

秋官之計料不踰乎三十斤匡衡之失論罪溫舒之不足司刑無鬼
哭之庭大理有烏巢之獄又若薦祖建宮元元之庭霞披雲冠飄飄
太清天子將有事也歲豆時籩夏簋殷鉶傳金爐之御煙開甲帳之
琳琅此王者之示孝也對里連街帝宅王家青門列檻棠棣分華勤
政外名花萼中題屹雲中而佩鳳杳天外而舒蛺於是天子設席于
羞百醴家人齒筵愉愉濟濟此王者之示悌也盛則長隄砥平錯則
纓弁繁夥佩印分魚九叅六佐肅威儀於行蓋指戒途於前馬待漏
未開朝騎沓街鷄鳴朱邸火度青槐先導擘雲後車奮雷遞以嚴聲
不生微埃人寒物慄統以京尹臨人秉殺罔敢不謹豪家減里金張
許史走騎如雲行車若水拉枯請命曾不仰視配前王與後趙固異
代而殊擬其地勢也負秦章臺倚漢甘泉帶涇渭之富流挾終南之
壽山指重城之二華拓外門於兩關元素交川灞滻在焉斷虹偃蹇

而亘梁拖輪走驟而蹄奔度萬國以向朝趨魏闕之通門赤縣統劇
停阡帝鄉長安萬年乾封明堂藍田左倚鄠杜前張分圻連平馮翊
畫郊接乎岐陽排吳山而抵蜀亘氏谷而通商天子穆清環衛陳兵
將軍之號三番六營至乃辨曉警昏主在金吾鼓列六條外傳通衢
備以嚴兵羅以周廬禁動息人用戒不虞其中則御水分溝昆明下
流在野決漑入宮環洲菰織蒲紉芰蘘菱羞渚戲元鷁沙眠白鷗其
遠也深有蛟潭派作龍湫涖接河漢波通女牛其近也方塘含春曲
沼澄秋戶閉煙浦家藏畫舟爾乃農家東作厥土黃壤樹以桑柘翳
薈乎南畝以杭以稌以黍以稷以輸太倉天子之儲土厚地中溫寒
以宜門多杖老室有蕃兒承化發謠帝力不知則有程鄭之家白闥
朱軒崇基峻砌侍駟高門木秀茸葩紅舒綠繁挺碩果於華林育豐
蔬於中園珠箔晝晴金缸夜明羅繡巾幘鼓瑟吹笙譁族陳賓以樂

乎太平貨隧分廛物次駢連中署肆師夕咽朝昏越璞楚琛蜀賄巴
賓裁綺張繡紋軸蕉桐聲教之所被車書之所通交錯雜沓斯焉會
同黃宅縑廬金篆玉局以張帝居用壯天庭千形萬聲不可多名天
子奉堯舜之道勤后稷之功當仲夏而獻蘭立中和而視農然後黼
黻時備采盛告豐其接下也則堯鼓不懸晉木不列鎔金作軌四門
是揭人靡迷邦土無諱訐示收材而問胥上諫行而寃達當其萬國
貢珍四夷納賁賦用舟通財因輦進地官計國度支主吝百姓旣足
斯焉克物復若天府萬品以備供職登饌則光祿獻厨命駕則太僕
承軾其樂人也大啟九重分開三殿齒群臣於坐次徵公族於內宴
於以訓恭儉於以示慈惠戲族咸在百弄迭改視仙童之霓裳覩壯
夫之角觝御階晝陰帝座春深繽紛宮闈窈窕嬪林旣受賜於逮昏
盡拜帛而懷金與衆之樂一日於此先生獨不習乎其四郊也故有

乘時之舊址亡國之遺蹤天子迎四氣盡然改容曰是足以懷傷於耳目作戒於心胸且秦政肆刑秦民共傾楚澤大呼分隳列城徒罷驪山役休上林秦址旣遷鴻門至今此東郊之事也隋苑廣袤置籠南山占地萬頃不爲人間齊門失耕禽遊獸閑代謝物移繚垣不完此南郊之事也豐水悠悠文王作周傳艱子孫哀平遂遷乃睠鎬都武王宅居國失赧遜豐鎬皆無此西郊之事也漢設五時以主淫祀樂誑徐誣將求永乂天子親拜太牢黍牡事亡地存爲天下笑此北郊之事也故因迎春則鑒秦敗知恃刑不如恃德也因迎夏則鑒隋怠知獵獸不如獵賢也因迎秋則鑒周勤知祖基作艱傳萬年也因迎冬則鑒漢誤知去淫即正獲天祚也四鑒已陳澤於生人四德已懋格於上下故我高祖一呼大定安都居正傳今皇帝一十四聖是知禪國也禪都也非得隋之命是得天之命

阿房宮賦

杜牧

六王畢四海一蜀山兀阿房出覆壓三百餘里隔離天日驪山北構而西折直走咸陽二川溶溶流入宮墻五步一樓十步一閣廊腰縵迴簷牙高啄各抱地勢鉤心鬪角盤盤焉囷囷焉蜂房水渦矗不知其幾千萬落長橋卧波未雲何龍複道行空不霽何虹高低冥迷不知西東歌臺暖響春光融融舞殿冷袖風雨淒淒一日之內一宮之間而氣候不齊妃嬪媵嬙王子皇孫辭樓下殿輦來於秦朝歌夜絃爲秦宮人明星熒熒開粧鏡也綠雲擾擾梳曉鬟也渭流漲膩棄脂水也烟斜霧橫焚椒蘭也雷霆乍驚宮車過也輶輶遠聽杳不知其處也一之盡態極妍縵立遠視而望幸焉有不得見者三十六年燕趙之收藏韓魏之經營齊楚之精英幾世幾年取掠其人倚疊如山一旦不能有輸來其間鼎鑄玉石金塊珠礫棄擲邈迤秦人視

之亦不甚惜嗟乎一人之心千萬人之心也秦愛紛奢人亦念其家
奈何取之盡錙銖用之如泥沙使負棟之柱多於南畝之農夫架梁
之椽多於機上之工女釘頭磷磷多於在庾之粟粒瓦縫參差多於
周身之帛縷直闌橫檻多於九土之城郭管絃嘔啞多於市人之言
語使天下之人不敢言而敢怒獨夫之心日益驕固戍卒叫函谷舉
楚人一炬可憐焦土嗚呼滅六國者六國也非秦也族秦者秦也非
天下也嗟夫使六國各愛其人則足以拒秦秦復愛六國之人則遞
二世可至萬世而爲君誰得而族滅也秦人不暇自哀而後人哀之
後人哀之而不鑑之亦使後人而復哀後人也

集靈臺賦

張良器

希夷乎人皇居明堂闕陰開陽冠通天兮蔭華蓋發大號兮流耿光
將樂瑤池之宴集由喜玉京於壽昌降清問於宣室討真經於柏署

乃因高爲臺順時謀築披翳薈剪林麓鏹重固移峻谷量其遠近以
議夫土功命彼般倕再度其山木使人以悅無告於勞均力取材不
遠而復屹九重以初起憑一簣而始覆其爲勢也峨峨皚皚粉壁光
兮朱門開若方丈與蓬萊其爲麗也崢嶸郁煜星柱浮兮雲楣肅狀
靈光與景福有時鳴猿告曉貞松斂靄千峰轉日迎秀色於瓊樓萬
歲傳聲和幽音於地籟磅礴壓乎人境杳劣聳乎天外王喬飛舄見
鳬影之翩翩神女窺窓聽鸞歌之噦噦俯衆山兮如束縈八川兮如
帶上方向晦宴息齋心防戒乘金根駟玉軼夸父秉鉞蚩尤揚旆鐵
衣沸渭以焜煌寶馬騰驤而沛艾環鈎陳而列武士震砰訇兮軼埃
塏登夫集靈之臺謂天帝而爲會奏無聲之樂寂寞而難分展無體
之禮質素而無文晬容綽約元化氤氲聖主湛恩散作八方之雨清
都喜氣凝爲五色之雲彼昇龍鑄鼎之后捧盤承露之君徒髣髴於

前載孰能成乎此勛然大造之德曰生大君之位曰寶未有離於兆庶而謂之至道願獻華封之壽上祝唐堯之盛股肱爲良元首作聖用壯辟雍之美乃經靈臺之政豈必沐咸池陵倒影脫屣乎寓縣棲真乎絕嶺屆中天之峻極從化人今習靜然後屆無何之鄉去有爲之境者也於是情宜其懿德貴惟恒可大可久不騫不崩動植風靡雍熙日弘宜其四溟式晏而人和年登

望春宮賦

闕名

青門之左兮層宮嶙峋資睿覽以臨下得嘉名於望春故在東以就乎陽位當出震必俟於良辰乃發惠和式遵夫月令無勞轍跡自表於時巡其初也度弘規法大壯標上苑而獨出儼複道而明望遠天聽以遂於群生浹皇情用交乎四暢解風微扇籠輕靄於高臺淑氣

和佳氣於林梢觀青陽之煦然載懷祈穀聽鷄鷄之鳴矣不使覆巢
布政有孚宸遊是假察微明於遠嶠睇新綠於平野南山之翠色盈
前渭水之素光在下蓋將賦籍田於晉代豈比撰吉月於周雅美矣
哉矗雲楣以重疊煥藻井以輝潤居高而遠無不臨涵澤而動無不
順諒可裨於恭默非取樂於崇峻况乎流鶯欲囀初柳生姿懿祥風
之習習增麗日之遲遲偉鳳闕之樓臺萬邦仰止眄龍鱗之原隰五
稼惟時聖上所以成化用彰克勤是務元功所以遐及仁術紛其大
布斯宮寧忝後之爲斯望匪盤遊之故旣而天地叶神人和修文以
昭士耀武以止戈然則賦望春之事宜乎播大雅而登歌

重修周公廟賦

并序

宋王巖

元祐元年春三月皇帝嗣位肆大眚以新天下詔書之下郡縣者
有曰前世聖帝明王忠賢哲義有大功利及物列於祀典其陵寢

廟貌廢缺不完者悉令葺治所以竭虔妥靈格於上下稽考古訓敦厚風俗其意甚美當是之時有司固當增置然制度狹陋草率苟完不足以奉承朝廷尊大先古聖賢之意今陝西轉運使游公元祐六年按行西路飭官吏卑財用大爲營建凡一百一十間又因其泉流導之者爲畎澮瀦之者爲池沼植之者爲園林培之者爲亭榭森布概列落落如畫圖間使人喜遊而肆觀焉至其廟貌尊嚴殿廡華煥左右仗衛塑畫羅列劍戟森然綵繪光耀竦動耳目而聖象巍然居其上髣彿如見當時坐明堂被衮衣抱幼君以朝諸侯四方萬里海隅之君奔走俯伏聽命莫敢後時制禮作樂七年而致太平以成周家卜年卜世之久嗚呼盛哉此亦天下之壯觀也惟周公盛德大業具見於詩書而法度文物載在周禮及其行事之緒餘往往論辨發于史傳諸子百家之書仲尼又以其

微意於春秋以深究禮法之弊此固非淺見謏聞所可道也因拾其已傳之迹而係之以賦曰

粵惟有周肇自履帝后稷不窳憂勤積累公劉基理釐爾士女太王避敵從者如市躬仁蹈義以迨王季文王作則德與民庶小心翼翼天下有二武拯塗炭昧爽甲子太白授首商紂妲已梯航四海車書一軌天作元輔曰旦翊世文王之子武王之弟武疾未瘳公告天地植靈東主請代以死至忠竭誠則始見於金縢受遺托孤則恭承乎玉几爰畀顧命乃攝寶位冢宰作誥百官總已於是輔導幼主咨撻伯禽坐明堂冠冕旒撫四方朝諸侯吐哺握髮制禮作樂卜世三十卜年七百營洛邑均道里設官職列朝士序同異封子弟建磐石之固宅維城之利五侯九伯犬牙相制揚文武之烈光率祖宗之大緒監二代之文物揭萬世之典禮噫嘻我直如矢我道如砥變生於獨

惑出於似君子既誠小人乃毀貝錦萋斐箕舌哆侈近則成王不知
召公弗喜遠則四國橫議曰公不利据手瘖口跋胡疐尾羣輕折軸
積毀銷骨青蠅上壁點白爲黑衆口鑠金呀吻利喙鴟無好音車有
載鬼蜮氣豺目蛟涎虎噬公於是時了不芥蒂是用居東以伐作詩
以遺不顧小忿斷以大義誅殛讒亂表暴仁智罪人斯得神告以異
大風偃拔開悟主意羣公盡弁乃啟金匱曰公勤勞訓我孺稚衮衣
告歸天地薦祉歲則大熟禾則盡起攝政七歲明辟復子啟封七百
土宇世嗣老於京師備道全美巍巍乎高哉遠哉兮宣德音以不瑕
爾然不滓豐功盛烈與日月而齊光兮烜赫晃耀乎垂千百祀魯侯
受命祭以天子血食萬世流澤千紀榮華至今歌頌不已漢唐而降
土木其峙想望風采恍惚夢寐載在祀典廟貌簞簋曰岐之陽在水
一漢面終南兮俯清渭瞻睟容兮望遺趾睥睨爽塏兮髣髴英氣殿

沉沉兮穹窿神其來哉兮昂昂顒顒層垣落日兮古木號風停流澄
碧兮晴影涵空丹楹剝月兮繪壁嘘龍繁雲翳翳兮暑雨濛濛遺波
餘澤兮幾千百年濫而爲泉兮滙而爲淵醜而爲渠兮需而爲川鍾
雲渠雨漑我甫田沃壤萬畝沂洄十里契理亂鑑臧否或通或塞或
涸或沸守令得其人則決不得其人則止歲在闕逢祭闕可歷肆沕
滴以曼衍極舒徐以逶迤蘭澤勃以滂湃晷澈冽其櫛比瀾堆埼激
霄墜淙硯硤漢泚泚淪湄滂滂靡紆洶洶洞洞淪淪泚泚蒼崖戔戔
兮白石齒齒若乃支分派引旁午錯出滌闔闐澆井里浸滌逆折乎
蘭若之圃汗漫溥博乎絃歌之地濡鱗翼於將勦蘇根茲於旣殘惟
餘閏之所浹無一物而不被至於風亭月榭層樓觀閣流珠漱玉清
聲爽韻洋洋乎方池曲江孤嶼絕島沐浴長養乎春陽而秋艾天波
空鱗雲山倒影涼颼兮皺輕碧急雨兮斂新霽皓月沉素餘霞弄綺

鴈落兮修漣生魚吹兮圓暈起沙堤兮蓼岸花妍兮草媚客有乘范
蠡之舟橫桓伊之笛延馳影以綸釣汎淒飈而膾鯉抹毫而吟挈榼
而醉不事王侯屣棄名利而深入乎煙霞之際以索於形骸之外養
乎中和之氣此智者之所樂而不可勝記夫是之謂周公之水辭曰
我思古人兮永想風聲徘徊明廷兮瞻仰儀刑野人何知兮桂酒芬
馨禳除凶災兮祈請冥靈歲時豐樂兮吏治不驚奉法循度兮天王
聖明我思古人兮姬公孔子忽乎其有見兮邈乎其不可致如有用
我者兮期月而已將以敬天之命垂於無窮詣於極治兮請俟周禮

西園八詠賦

明
沈周

粵惟苑囿園池之屬闕中者鄙夫無一隅之及一日之覩矧聞之髣
髴於今稽之掛漏於古聊準長安之西笑托公子之夢語嗟夫上林
之草甘泉之井矣御宿祿矣樂遊黍矣西郊之免跼矣宜春之麋麋矣

梨園燬而礫矣凝碧夷而土矣類皆前王遊畋歌舞之區鄙夫蕞

所取也取則不無郭令公之仁里邵故侯之青門李將軍之北郭三
右轄之輞川俾人追惟於往致儼水木之如存又不無代遠人非於
懷慨然然而何地無勝何代無賢何賢無述何勝無傳時則有若耀
之爲郡實古雍地平原廬而裔衍諸陵矗而足峙荆耀而玉韞地靈
而秀萃截薛突秀而近拱漆沮流潤而暗匯壯哉三原之佳甸洵矣
三輔之遺治屏八垠曠蕩之風鬱大塊塊北之氣負陰面陽審形遵
勢宜賢者之胥宇嘉勝者之收麗百堵仡千弓迺從相卜迺從空
厝迺從構架迺從樹藝孝以爲基忠以定位壙中類仁制外侔義方
之象行圓之比智厚以積德高以抗志於是大司馬公拓爲西園以
藏以修存誠而樂道觀物而翫化非文饒之錮愚非季倫之豢尤徒
悅耳目而恣般遊者也有碑勒銘在墓中堂史氏大書燦爛厥章於

考世德於發幽光靈蔡鼐鼐而薦力文霓昭晰而呈祥其側有堂兩
廂翼成楊蘭擗蕙茨芸填藹浩浩穰穰儲書滿盈紛者百氏秩者羣
經標牙刻玉籤軸熒熒其前有池湜湜且泚不漿不溢不淢不澹擅
雪滌之專攻潔垢硯之遺滓日新日資舊染是去方沐之槃簪飲之
洗有松於軒徠服其隔離立矯矯直不假扶結瑤爲根聳玉爲株冒
雪而脂被霜而腴負大且固葆貞不渝歷載而壽無度效材而需不
訾有柳苞矣柳門之側匪朝匪夕先公之迹骹骹櫨櫨紅總翠輅累
和嶠千丈之譽襲馮異大樹之烈公之理南都也其在默運疇昵疇
測其在獨斷曷憑曷藉祁然而威行沛然而德化潤廣則何物不沾
庇大則無物不借民仰如雲所謂用作霖雨而澤下者也曰州曰藩
公所蒞止化覃澤加則民之衰孱寡弱猶培而廡猶溉而華轉富而
易庶若出乎咄嗟民之佩荷激切將以棫樸榛楛此公所樹之柳甘

棠綠竹比公所藝之花公尚以池凡庶執事爰有汙墨沙之汰之蕩
之激之公尚以記末學膚受瑣才小能舉錄而鎮採兼收而並登揆
方圓而施用期將就而勸成方我句吳之墟淦流湯湯爲割屢年民
告飢墊天子簡公來旬來宣民乃驩呼拜逆鄙夫亦獲瞻承光霽識
公宏正而亮鎮簡約而靜淵以之柱石則明堂底定以之調元則庶
徵罔愆其時也於公之園奚止二四之可賦來百祥之駢駢草靈芝
茁木仁理連華峯燭燭醴泉涓涓或蒸之孝義或應之忠藎其氣在
人酬酢於天尚爲公賦之以屬於篇

夢遊太白山賦

并序

康海

余歷覽載籍所志古人之辭由屈原宋玉以來不可勝計而浮靡
侈放之辭益托諷寓興者之所共趨上林之後益蕪益漫亡能爾
雅志士之所賤也余感風人之義因夢遊太白山歷見奇瑰駭異

之狀而作賦雖極假借要皆自喻其迹少有虛謬謾駕凌絕之病
示諸同志皆曰可錄

弘治闕逢攝提格終相之月康子夢遊太白與金子可卿乘馬領僕
各執糧糗飫飼之物浮漆渭跨鄆塢環惇物逾武功去約萬里四望
塞蔽恐怖獰突惶惑震厲若將遂爲虎豹之噬有老人者雪髭鶴髮
電目龍顏自西而來若愛若識請以前路則笑而不言少頃復去金
子曰若非山川之精耶豈將疑我以迷晦顧我以虛誕也乃躡以其
後則豁然四開巖回徑折泉下雲散予曰是未可止也天入絃之廣
獨有太白盤礴崕巘嵬嶕嶸峭崛神靈秀明磅礴業薛夫是但謂末麓
近壑然未邃也乃與虬蜒仄石轉附垂藤升矚巉壁靜嘯絕坪忽萬
里之瞬側何溟渤之未窮雜卉菁葱石泉沸騰嘉樹駢乎九御神風
颭乎太絃駉駉散乎餘粒蛟螭視乎細繩電光恍乎山足雷聲浩乎

廣聽零露凝其在衣松濤悠乎啟聲金子曰快哉遊乎夫造物者假
我以聖智崇我以令德我弗用觀奈此膚景遂直詣而不回何茫迷
之勿騁乃爾若神物之可憑歷千岩之邃嶺山石儼乎華嵩細流浩
乎滄溟蓬蒿翳乎峰壑墜葉震乎雷霆老人跨鶴從雲前下笑曰異
乎子之善勇也夫太白始峰炎暑冰泐萬夫之勇亡有敢及况迨於
是夫是泉脉應乎坤軸遮飾極乎越區天局邇乎可聲神祇恍乎可
呼至循崖之前重谷之裏百鳥不宿神獸亦避雖至人亦蔑有入也
越上百里西下陰壑復闕峻岳則金屋龍棟控亢聳搏異花雜乎瓊
瑤仙風冷乎清綽靈芝馥乎滿郊麒麟馴乎盈郭龍蹇屈於平池鳳
翽翽於長漠此則上帝之秘區而太白之關鑰也其東百里瑤宮蓋
殿萬戶齊啟蒼光青氛四面周起函丹書於億笈紛朱紘於兆徵散
靈蘭之如斗歷綺縠之奇靡總百綵而具存奚瓊挑之如纍此又太

乙之宅合陽之宮至其南也朱雲陸離丹閣霽霽神桂宿日南極奉
塵羽翰極乎麗暉珠貝極乎雕飾鵬鶚駕而鳳軒鯨鯢御而兕履是
謂朱明之宮天帝之闕北則至幽號曰元府紫微之所宿萬象之所
聚玉臺瑩光永柱炫色珊瑚如林水晶四徹雲沆瀣而守默氣鬱森
而馳起靈龜元龍參錯其下松檜接乎帝閣金碧曳乎泉石翼八獸
以守衛役百神而司臬夫皆五天之至精萬化之樞紐能有至者皆
必具靈負秘與抱圖膺籙之士有天之德者也已而風柔香墜路
豁視空若雙龍之負引倏靈宇之就中仙姝麗乎兩間洞簫錯乎萬
笙浩歌凝乎飛泉朱絃颯乎翠空座列煥乎雲端境象委乎穹櫳環
珮銷乎旒旒禮數儀乎動容子乃攝衣升堂長揖就位悟人世之囂
紛歎靈局之皇閼乃與金子終身同丈人居之不去

華山賦

許讚

噫吁巍哉華山質聳千萬餘丈於鰲極之初分其高無垠根蟠千萬
餘里於混元之始判其大孰倫突出雲表直指天津噴吐風雷拂拭
星辰慨自洪荒以來義農之創則軒唐之造釣舜禹治績湯武革因
皆興起於岳麓之左右孰不法象乎儀則而仰遵乎明神迨夫秦漢
以下則但知陳玉帛以徼福具牲醴以致禋而已孰知獄宰西方秉
灝靈掌商政令肅貞上天付以收斂劾實之名號委以清汰勁政之
權衡凡物之未過者不阻其長養物之太盛者必伏其裁成故月無
替次日無逆行雲無妄發雨無妄晴禾稼不得過時而暢鬱草木不
得驀候而妍英夫西行爲金金禁也物之流溢茂濫過常度矣禁止
之而不得肆金色爲白白質也物之炫耀文采失本原矣迫還之使
歸於情匪曰摧其華節之則復生匪曰傷其英斂之則復榮此嶽之
性情司令通萬古徹八紘而無息無更者也以言其景象則黃河洶

湧望嶽而南注者若朝涇渭潯潯遵嶽而東過者如綿玉井澄冷兮
蔚寶蓮之奇祥月嶽窈窕兮森蘿藤之芳蔚砵青柯兮蒙古樹之槎
牙觀白雲兮聽飛泉之鼎沸其至奇者五指差峩於凌巔千載具言
而可畏名爲仙掌不知何謂豈以制引煙霧虹霓而節宣化理抑指
揮垣度辰躔而佐調元氣乎其名曰華者則以其亭亭萬丈而巖巖
交匝靈秀萬狀而四出如蜩礪礪無窮稜層難旣依稀乎紅紫葱蘢
乎蒼翠或析瓣分枝或呈葩衍類望之者真如芍藥芙蕖而四面互
植玉樹玫瑰千章交蒂也名之曰華是爲可貴

夢遊山賦

楊爵

時和煦以轉泰兮歲惟丁夫壬寅余彷彿於夢中兮夢歸遊於咸秦
歷韓魏之故疆兮泛柏舟於渭濱浮颼颼以遠覽兮暫憇夫山之危
岑乃吳岳之崔嵬而秀麗兮古號曰西雍之鎮峯突岬以峻出兮勢

若連乎霄辰石巉巖以嵒嶒兮百壑研其嶙峋風習習以清和兮迹
迥脫於世塵草與木森森而夭喬兮秀雲邊其茱萸鳥與獸蹒跚而
頡頏兮若解意以相馴子乃采芝蘭以聊茹兮氣和煦而苾芬把清
泉以時酌兮蕩吾平昔之塵襟忽回顧以寥廓兮百峰羅翼其共臨
俯仰余長嘯而朗吟兮高胷次以樂真山有廟焉迤邐其麓之東南
兮以時妥侑乎嶽神棟宇苞翬其壯固兮丹青煥乎維新背巉崖而
面涇渭兮延廣袤其幽沉古取夫萃與渙之大義兮儼嶽像以獨尊
予乃肅容儀以瞻拜兮心慄祗其快覩復長跼而祝之曰惟明神其
監觀於下土以大義而降禎祥與妖孽兮斯固無幽而不燭夫何世
事之紛紛乃有稽典訓而不類兮固予中心其眩貿予敢筮游衍而
不予隱兮願得夫子奪之微故惟予小子之有生兮何不辰而遭世
風波洒憂時之血忱而貞志於孚先兮固久罹於窞垓時省愆而思

咎兮求不忝於屋漏於歲月之陽春兮今已兩過念予總角而志學
兮每矢心以克邁嚴步履以出戶兮敢斯須而或怠景先哲以周旋
而與歸兮忽凶害焉其顯崇固予小子反復思之而莫知其謂也語
畢悽慘流淚潛然偃僂伏俯聽神所言惟神鞭爾而有聲兮復喟然
其長嘆曰嗚呼來汝小子兮是爾之愆爾不聞曲其躬而圓其行兮
取封侯以相先或有貞直方而未少回兮死固不免於道邊當行而
吾行之兮當止而卽止斯先達之明訓而可敬服兮胡不珍身而量
處道固不能無消息兮應斯有常而不苟相幾而或少戾兮夫孰
非以災而自取惟明哲之見高一世兮動自遠於坎硿燭隱機而尚
肥遯兮泛長江之一舸乃有迷檢括而寡諧兮拂潛晦以自頤衍崑
山之良璧兮人共惜夫楚和履大閑而不苟措兮固自謂世所尚也
當於鑿之不類而欲強置兮孰不指身心以爲訛嗚呼小子而今後

其尚亶亶焉以克勵未可以一蹙而遽挫思福堂之玉汝於成兮方
一念之偏頗惟古良士之堅志於患難兮思尚友以切磋寧雉介之
耿於羅網兮勿狡免其爰爰寧松柏挺挺於歲寒兮勿桃李其灼灼
何所往而非吾可安之地兮慎無怵中而懷憂彼皇矣之全賦於有
生之初兮惟反身而是求聽吾誨爾之諄諄兮尚不忝於前修苟迷
途其終不悟兮將脂韋以自羞予乃再拜稽首而起應嘒嘒其未已
旋周旋以出戶忽驚愕以覺悟時東方之既晨愧絲粟於枕衾嗚呼
天耶神耶教戒懇切誠可信而可遵大道坦坦而無曲兮固不越乎
吾之心

觀宇篇鉅賦略

文在中

夫八郡三陲更僕未易卒業請略道鄴鄙之舊而吾子自分寸焉夫
關中據六合之上游負函谷之天險庖犧神農軒轅帝嚳以來周以

鳳審秦以虎噬漢以龍興唐以豹變隋以鴟張符堅姚萇西魏後周以狐嘯而猿喊璽而皇者五莽而帝者四是謂秦地披山帶河四塞以爲固入關而都秦之故此搯天下之吭而拊其背奉春以之而建天策關中左殺函右隴蜀沃野千里南有巴蜀之饒北有狐苑之利三面固守獨以一面東制諸侯此所謂金城千里天府之國留侯以之而贊劼謨秦形勝之國帶河阻山懸隔千里帶甲百萬秦得百二地勢便利下兵於諸侯譬猶居高屋之上建瓴水田肯以之而賀廟堯塹華爲堞因河爲池據億丈之城臨不測之谿有席卷天下包舉宇宙囊括四海并吞八荒之勢長沙以之而過祖龍三輔之地南界江淮北濱河渭汧嶺以東商洛以南厥壤肥饒此所謂陸海之地文脩以之而獻武皇前臨沙苑後枕虎岡左控桃林右阻藍田漆沮其東涇渭遶其北依山爲險形勢雄壯雍史以之而標地靈則關

中形勢甲於天下秦中自古帝王州咏於詩人殊非虛也是故金精
方盛天畢用權駕餘艘之舟渡渭水之灣過咸陽之域思阿房之宮
其下可建五丈旗而坐萬人閣道迤邐屬乎驪山之陂者殆二百里
宮車顛頽而度馳懸橋而轢天宮愚黔首而莫測橫半宵之蛟龍雖
旣招八州朝同列鑄戈鋌爲鐘鐻殄滅三代之子孫隍漚六王之雉
墉乃始皇帝之爲人下絕地之紀上斬天之脉而剩嗜遐思軟苒而
伏諸胷臆者何其雄擷燕趙之菁英籠鄭衛之處子幽鬱而閉夾槐
垂柳永巷之內且三十六年猶爾屠湘妃之廟冒博浪之椎伐五大
夫之松命盧敖徐福驅童男女數萬人嬖姍扶杖而陟蓬萊方壺崑
崙崑崙之危峰然而戴岌天之竹冠登華岳芙蓉明星之嶺擎蒼龍
之鬣而西顧繫飲海之苴屨躋五月積雪疾風暴雨太白之巔乘陂
半瀑布之雲而東瞻揖黃河龍門積石萬里洶湧之波而問道攀崑

崑瓊瑤三珠之樹汎星宿之海而撐船詔渭伯來鼓檝檄涇侯使張
旛駕鴻毛於弱水過黑津而陵瀾當其青陽謝侯朱明統天馳馬畢
郢奉天之原而跣青莎則漢唐之陵壘相望未始不動六合之忌而
願爲赤龍子天策將軍執鞭至若祝融揮汗而却步蓐收鼓浪而潺
湲買瓜楊城之隈以傲盛暑問酒新豐之家而涉灞橋則隋宮雖以
陲階粉榆猶樹舊川釋十六苑之湖池海藪而幸江都稱觴未央而
與仲較生理桑枝遷於海上蜀王化爲杜鵑紅塵萬古白雲橫山布
衣與朱黻未知孰尊鴻溝疆界今已漲漫馬上顙顙徒掣龍淵粵惟
漢之故都於今實爲長安英雄之遺魂何在娥嬋之粉黛成烟不堪
東郊皆禾黍令人咷唏淚泗漣吾聞鑿昆明之池以習水戰豫章臺
之石鯨魚不識其遇雷雨之期而猶鳴咤動其鬣尾而鼓其喉舌秋
風孤子之歌可爲咷咽杳梁窮迫幾窮之韻東方生於茲乎不復謳

左牽牛而右織女空取象於雲漢亦周斷平阿脰臨影蛾而翫月思
宮嬪之乘舟乘通靈以懷舊顧青島而生愁毓皇躬於猗蘭逢七日
而張衡遊結衿之太液悲啄菽之鳬鷗經焦獲之古藪尋白公之渠
流越甘泉之坑垣踰通天之高邱過柳邑之深谷訪大曆之壽湫嘉
鄭國之灌溉請木工於韓侯頌成雲於舉鍾欲作雨而決溝觀彭衙
之戰處覽咸林之蓮洲緬緇衣之遺武壯孟明之焚舟閱鴈塔之蠡
勒夢學士於瀛洲遙召燕之曲江想天寵之綢繆出種瓜之青門嘆
邵平之無求嘯雲霞而覓侶何駢趾而結瘤若乃麒麟之圖像十一
人而不得與博陸之後典屬之前則魂悵惘而若怯凌烟之功臣二
十四而謀謨不得房杜次韜畧或與英衛踈則撫遺趾而三嘆祗謁
踏而躊躇孝文之受釐宣室處今仍在恨不得干前席之澤與少年
之洛陽人論鬼神幽明死生之秘說非不會於氣謚但代神荼而鞭

夏朔之梗魅駕天寶而出宇宙以馳驅明皇之金鑾殿沈香亭香戎
無賴恨不聳李白賜食調羹之寵賦名花傾國之句而賞西本芍
藥之蔭蒨馮夷擊鼓湘妃出歌岑參之兄弟非不好奇每過溪陵而
思嘉魚秋槐葉落萬戶傷心王維之忠肝一片不下睢陽與常山勝
凝碧之池而或爲若人三垂胡杜欽對策何如幸芙蓉而下馬之董
仲舒覩白虎之噌吰而阮吾前傾天人性命之囊世卞氏三則於荆
山之璞而王何沽張禹說論語尚書何如扶風之峽不辭寒暑而讀
書之馬季長賂金華閣之僊僊乎雲灘乃知剪篲而讀墳典即索之
殘篇不起倚相神淵六經契斷八卦籠絡無雲磊落之才集於幽巖
厥初枉六射而懸弧冀闕未及長樂建章宮泉玉井之環繞而紅雲
創於秦漢指天星而干闥闔之問乃草元執戟墨卿翰林可推第一
總總焉懼不得步金門而上玉堂黃衣白鳳之辭取而覆瓿仙林

春翠微大明興慶華清之黜然沖瀾而博敞經營乎隋唐已遺鎬池
之蒼壁而不寤徒勞由余之鬼爲而向愚以采蘋之淑而賦樓東以
侯夫人之雋而懸朱棟千古大不平事殆如寇鳧况辭人騷客邇夫
珎士幾得志於枚箇焉握瑾而持瑜不願學鄼侯藏六家河洛之秘
圖於石渠而究要害焉得偕子政校七十二乘之奧典於天祿而然
青藜桓溫非鍾期則攜手王景畧之豪傑捫虱而談世務於華山之
陰門前水倒流望人十年而不出吾何待則始掩僧一行之北斗七
星於甕中推曆法於銅人之廬王官濟河而封殽屍吾將罪穆公不
用蹇叔黃髮之言而襲鄭之東門終非計致大鳥於喪前垂闕西之
師募設覆鼠以肆嘲歲星照於華隅起黃帝而作史懸龍門而垂鬚
良弓藏於鳥盡弔淮陰於櫟墟步咸城之北原嘆子房之與商山同
區軼華胥於藍郊奠桂酒乎平蕪訪尊盧於南陂憐牧豎之掘狐帝

譽藏骨於邵陽先莘女而孕秀腴蒼頡伏綠字於白水聽鬼哭而陵
煤瀕陽老將夢王翦細柳旌旗憶亞夫杜郵白起復何罪常侯道園
亦非臞陳希夷青坪之睡洞可橫吾之肱而卧其廬秦王子嬰奉璽
之枳道徒流涕於始皇之長城而思飯清蔬華子岡乃輞川之絕勝
安得偕摩詰而戴茱萸特勒驃爲六駿之超蹄越醴泉之石刻而跼
蹐指戲亭爲笑柄舉烽燧以悅衿裾有扈氏與帝啟戰於甘之野則
在鄠東鬼塊作書三篇責禹亂大下事厥說有根而非誹於膚跼渭
原之草而跟蹤拗黃河之波而陪鯁攀文武之陵而收汨蹠高景之
寢而涕垂翹崇嶺則檢躍而欲騰驤俯深崖則採羸而謀療飢經略
乎八水之濱而菱荻網踰乎五陵之衢而颺風吹秦來漢往騷騷
焉如麋鹿之逐西陂前古後今覲縷而起在子心如蠹蠶之抽繭絲
則吾安得憇鳩摩之淨土樹兮摘八月之桃實而袖歸扶仙人之九

節杖兮柱玉女洗頭之盆而浣埃緇騎龍首之壘
以周視兮索渭水樊川之窈窕而棲遲餐終南之合
離丹青而黜金銀兮誦儵黝詰曲之辭於昌黎連
亘乎太一之礪危插雲霄而直上兮近天都而問
阿維陞驪之坂曦東西之兩繡兮下盍於溫泉濯
子纓之颯纒慶之風雷湧面堆阜出兮重俞俊陰
陽之說而扶冠纓歷七盤之十二綰兮蒐藍闕之
雪跡於嶮巇覲仲之巉岩兮思圍獵而致風雨之
涕洟石鼓之原問承露之金盤兮躔逡運而臺榭
糜王嘉隱於象山兮聞倒獸而詢涓涓少華多荆
杞佐白帝施雨澤兮崩於宋而亂石陸離鳳御圖
而至扈岫兮軒皇拜而受之青石出於磬山兮廢
四瀆如白磯三石鼎峙於漆水兮萬斛如斗形之
旖旎獲寶鼎於汾陽兮至中山而黃氣氤氳以淋
滋鰲背之峯巒若龍相之所鈞兮吾將郅龍門之
懸泉而暴腮九變巖巖六百餘尺兮上石門攢天
之嶺諸岫如鋪

綦紫閣峯陰入於漢陂兮落雁高絕可通帝座恨不攜謝眺驚人詩
來問真源於素威始平之原築於廣漢兮白鸚紫鴛旄牛青兕充物
其間從之上林要非白衣分之攸宜太真終於馬嵬兮還一斛之珠
竟有報於梅妃獵五丈之屯懷諸葛之英明兮馳鴻門之阪嘉赤龍
屈信之委蛇觀長平覆地之盤蟲兮識秦國之多赭衣令人俛眉而
思古昔兮屈指乎西伯與庖犧西極子曰若淑夫賓之論兼乎融融
纒乎洋洋然則雍之美罄茲乎西州賓曰未旣夫雍跨有西北厓隰
華陞居天地之大半吞邊域而爲疆迤邐綿亘三千里海內之雄也
由京兆至於扶風三百里隴關阻其西益門楹其南五水所會三秦
之一此古西伯岐周興王之地鸞鷟之所騫翥汧隴之間又一大都
會也赤烏啣書天柱嶢峴實誕聖瑞爰基鎬豐石鷄晨鳴陳倉之峯
聲聞三十里音中商宮吳岳爲雍州之鎮曉光連翠巘而容裔望輦

大賢奇岫五出帶霓而摩乎層空天水大坂是曰隴山九回不能窮
其隈七朝不能越其巔隴頭流水不堪聽顧瞻而生悲思肝腸斷絕
而望秦川諸葛亮與司馬懿相拒於五丈之原彪虎颯颯如欲吞餐
道道之間奮化爲灰塵跡淹蔽而黥黥與渭水而波瀾呂望釣魚則
在磻溪石室尋篠而不見徒眎林岑之高低丹喙鳴於樹間鸚鵡出
於隴西問上皇之安否假郭浩而寄思蕭史吹於鳳臺致孔雀之翻
飛得羽化之妙術偕弄玉而齊馳女登感於華陽炎帝生於姜嫄臨
西號之舊城懷文考之萼輝傷蹇叔之諫鄭媼秦誓之知非周召之
所弄璋乃詰濬之舊圻惟二張之繼產型範垂於關西由扶風至於
漢川七百里地兼梁雍之二州星參翼軫之四宿前瞰河華後蔽巴
蜀崖谷險絕千里百折秦之坤地蜀之艮方關頭荆尾連高夾深漢
高帝赤龍之所提劍張魯之所狐嘯而竊據諸葛八陣之所伐魏而

六出褒沔之間又一大都會也漾發源於嶓冢合沔池而爲漢嘉陵
潏沔沛艾若箭出散關經利閬入大行如匹練在戰國爲白馬之舊
都於南鄭有褒國之古塹天柱懸崖下有碧鈿藥婦醫夫化石爲變
石牛糞金五丁擘堰曲盤十八始登江岸金竹之縈流七十二略陽
之渡口一百八山桔槔而摩谿水渺瀰而誕漫縱使中黃作鼉而發
弧誰能沒羽洞褒斜之雲棧惟南北二日之相距亘四百里而爲行
旅患獸蹄天矯而不敢過鳥羽譴喘而不能轉留侯燒天梯而韓成
熙子龍壞赤崖而諸葛詘雖用情之不同皆忠白之僅見匪佐卿之
化鶴豈能越飛仙之嶺而幻閃脫扁鵲之飲上池水亦難柔山消石
穿幙頭之七十二洞而揖長縮之真面由扶風至於安定三百里水
土雜於河西人煙接於北地咽喉靈武襟帶西涼黃流在其北崆峒
阻其南隴山環拱渭波夾繞此漢之朝那介於涇原環慶之間又一

大都會也惟崆峒之杳冥而赫眙兮清烟與玉繩而齊浮軒轅旣柴
岱宗兮遂陟崆峒之別峯曰鷄頭廣成子處於東嵒之陰穴兮外慮
不足滑其靈脩屈至尊而稽顙請益兮峭壁幽洞垠堦屹其猶留涇
發源於城之白巖兮汭自華亭而上流揖渭水而會陂兮至龍門而
洪河投殷之妣已尚有川兮秦王馬跑之泉亦沓漉而成湫皇甫謐
讀書之處青草攏慘於靈臺兮三都賦序體裁何容與而儵憑烽火
動於蕭關兮動漢文之西憂武帝登崆峒而出茲兮亮羗夏之襟喉
王母垂五色雲而來降兮漢帝聽崑邱之謠於西州煙雲鎖於臺館
兮問道之所下於重巘有洞穴之可求此盖古之密國兮頃聞康公
與其王游西北不必秉斧鉞兮入我版圖已成千秋皇甫規恥不與
羗人兮自繫廷尉而罔知愁厥妻草書而屬文兮罵羗人而不爲夫
子遺羞皆溪山之秀氣兮邈古昔而寡儔璘與玠之戰功兮亦彪炳

而可蒐由安定至於隴西八百里天水名郡關西重鎮倚西傾朱圉
鳥鼠諸山以稱雄接壤羌裔通道西川背山面池襟帶秦隴之間又
一六都會也於春秋三代之前兮本氐羌之所居至非子之養馬汧
渭兮孝王封於秦都隗囂與其將王元協謀兮遂偕公孫子陽分隴
蜀而崎嶇杜甫過之留詩於萬丈之潭兮並西地之十九泉而懷諸
李白逸才乃隴西之苗裔兮與其祖廣射鵬之手奪成紀之膏腴紀
信姜維皆偉人兮死君之難輕其軀如錙銖充國產於上邽兮金城
方略垂於麒麟而與博陸驅雪山冬夏不消兮西傾載於禹蹟蟠冢
導漾東流爲漢兮乃六江之頭顱庖犧陵在三陽之寨兮蓋由履大
人之迹於華胥冠三皇而首出兮畫八卦而制鴻隅乃知崑崙信天
地之元首兮以故關輔爲諸聖胚胎之所須由隴西至於武始一百
里控邊陲而爲域接巴嶠之襟裔南得鍾存廣其腴土北阻大河以

爲險固臯蘭峙其前長城爲之障此嬴秦之舊封隴西之故地又一大都會也惟臯蘭之峒嶺兮爲州之主山其下地勢之平坦兮可屯百萬之兵而令甲頌危巍而時有嶮嶮兮西秦築城於此而歸熾磐洮河之源出於塞外兮流入本境經數百里而曲盤膠瀉消涵聲如萬雷兮並東峪三岔激灑而相連蒙恬發兵三十萬北築長城蓋在斯兮一朝禍起蕭牆山東諸侯入於函關李晟之繫朱泚息奉天之亂兮望墓草而悽慘由京北至於北地九百里城高如山池深如泉原阜錯列溝澗輻輳境接羌人山川險固爲關輔保障鎮於邠寧之間又一大都會也惟不窵之舊都兮在昔號之曰北豳寧爲古之義渠兮秦滅之而建屯真乃隋之羅川兮獲王直而得馬連出於合水兮九龍遶乎寧城鶩池浚於昌言兮厥洞獻窘而涼風生小鹽池爲三輔之利兮花馬與李羅而相縈陟靈武之臺兮肅宗登極之所

猶未傾越范仲淹之舊宅兮馬旣過而復更讀郭子儀鐵券之碑兮
嘉其孫訥用思之爲精岐伯之素問難經於此作兮彌軒皇而寃產
癥獻古筆冠一代赤城乃其母家兮訪諸故老得之惆悵而意不平
由北地至於上郡五百里形勝之地五路襟喉洛水之交三川所會
北接邊塞南障秦邦中外之衝鎖鑰之關又一大都會也惟橋山之
蹉跎兮蓋我軒轅之衣冠遷倚蹇產林木翳薈兮上有古柏之丸丸
蒙恬扶蘇監兵而築長城兮何一去而不還黃河流於東北兮洛水
經而爲長川直搗土門之十八寨兮猿臂之李廣不侯而負慚涉奢
延無定之波兮渭濱咆勃而激乎赫連誦秋風白髮陳祐之詩兮我
馬迴復而周環過中部而謁黃帝兮雲色英眼亦向睇夫玉仙少陵
豪傑寓於鄜之城南兮羈竄孺弱或啼饑而彌年君子其窮何悻然
而發浩嘆兮爲饑寒所迫而聲嗷嗷白雲片鶴之遇趙鼎兮識中興

之名相於汴前後至吉陽而相逢今知浮萍世上死生之有定緣由
上郡至於雲中五百里遠際龍沙四無襟帶營堡相望烽燧連烟東
枕高邱西橫大波南阻岡陵北迤沙漠此亦雍之一大鎮也惟秦之
却外患兮樹榆枝於塞溪古號爲九原與勝州兮蓋三輔之障隄經
石峨峨而赭赫兮近代築榆林爲城隍有水迤延來自沙漠兮從石
而下陡落數千仞如倒甑孤懸一方所謂備榆中之關兮誰其策士
馬之窳疲安得倜儻大畧之士還我舊物兮寄言當塗勿聲腆而遺
茲由北地至於朔方五百里黃河遶其前賀蘭聳其背靈武古界西
陲巨屏西北以山爲固東南以水爲險於春秋爲羗人所居於晉則
赫連夏都會之地唐末據於拓跋思恭宋興城於厥孫德明此又雍
之一大鎮也惟賀蘭之山龍從而慎歷兮丹崖翠峯盤踞數百里以
稱雄草木葦茸而果園賊兮塞北江南讓其雲烟之鬢鬆石甯黑鷹

偃蹇而不可路兮琥八惇子澗溪險惡人蹤罕到颼颼紛紛獨逞獸
蹄之倥偬蒲草鴛鴦洞水澈湔而澹泞兮紅花秦梁分河流之波而
漑我黍稷賀蘭之上有元昊之舊宮兮人雖予賴墻壁猶儼然而橫
古松築高臺而臨之以極山川之偉觀兮沙土萬里清驢焉所用其
翺幢黑山黃沙征夫之所宿兮闔人出閣望北雁而曜容斯謐而腸
斷不足言之過兮樹之丹棘要不得消此離宗由函谷至於酒泉三
千里襟河帶山爲羌人通驛之路環以祁連合黎之峰浸以居延鮮
卑之水萬山環抱三峽重圍紅崖峙其左青海瀦於右漢武始置酒
泉武威張掖諸郡者卽斯地此又雍之一大鎮也惟祁連之峻號天
山兮草木茂懔冬溫而夏涼天梯青巖偕焉支而摩蒼崑崙山積雪
不消與日相連兮周穆見王母於此跪陳觴而踉蹌積石三危禹之
所導兮皆羅列於龍勒之旁風卑禾羌獻我青海之地兮魚鱗背負

黑點而飲玉漿弱之餘波入於流沙今黑水爲雍州之西防若夫洮
乃吐谷渾之舊邑今岷亦古之西寇夏禹見長人而受黑書今是在
岷之下遣歸霄而遺玉裝河州靖遠漢之金城今紅寺會城盛景喬
桀而斐亶羅於絕荒爪牙相控將數千里今換貞勒石而追拓邊者
須戶庭夫八荒

龍橋賦

本朝
韓詩

邊那石有五以繼鰲之左足吾初覩天與地廼補苴之清寧邇掌開
芙蓉之西壁錢唐君遂萬督其血腥彼羣峰巨江在域中合天地山
水爲四大得非台莫或與之經若是陽冰七星實津其天漢祖龍表
牽牛清渭使帝座接夫三庭不見衆輪之外廣漠馬賴之上木垌非
煙凌而欲斷雲如女而忽停蓋下貢黃歆之寶馬上流西極之丹青
遇雨溯澍望美人於天末則何似一角九頭之踴躍於元冥說者以

治其涇之支也涇尚不附離於道元之撰又孰辨乎朝宗者萬表茲
之一也而得頡頏於至濁之形峭函東據符禺南屏西則褒斜隴首
之孔道北則雲陽谷口之依憑觀井星而人從繙出慨然念吾手之
無梁何罔擬四海之波澄即一帶之渺若河山已奚俾夫戴日戴斗
之儕升驪龍果飛梁之莫企造舟擅風雅之誕登架黿鼉而九江坦
道填鳩鵲而河鼓媒乘乃有伐蜀之子渡蟻之翁一浮而敗一餒而
飴相期何後相涉何氷遇者作帝之師惠者舉相之能雲翥霞蔚波
折流興決渠而降荷插而成黃支大宛佩玉鳴篳端阿標犄角觝瓏
玲目眩轉而意迷體逍遙而節靈若雲蒸兮在下若日出兮當心夾
兩龍兮游蒼霧采秋月兮橫孤襟於是春漲鮮顥清英載陽王芻商
藿馬帚懷羊無疵諸慮拘攣甘棠葉蔭本密夏納晚涼白華野管桐
木棧桑維神蓐收苦菜寒漿水臺亭歷蒲柳權黃綸組帛布冬日爲

衣菟葵馬尾蹶洩檀梨莫不盛往來之觀極娛游之樂備口腹之美
竭聲色之謔襄公過陳而嘆興司馬升僊而題作苟騫崩之不葺雖
揭厲而難度爾乃制度精巧鴈齒絕程方圓合妙又象錯陳般僿棄
其剗王繭投其鈎繩上象紫宮之崢嶸下等寥廓之無垠南北交
會鷄犬相聞羽檄朝至皇華夕陳鳴珂甲第棧閣聯雲珠琳梵宇倡
麗優伶炫靚服妖粉白黛青霧縠飄揚紈扇絡纓車香馬柔洞魄駭
睛有時指壁而倒聽楓葉有時貰酒而往問黃鸝之聲四顧岸峙塔
道蹇產畫闕朱甍壘罪嶄巖何必求閨風星林之離立又何羨乎喬
松安期之遙遠舉杯屬月非卿不立非聖不成委裘之登雖北延眺
嘆其佳美魏亮之崇渭水百姓利其經營偃半月而作勢累巨石而
代楹少游建大夫之號隱刑逅擲巾之生間者風起濤作天吳震怒
懷襄可虞鴻流湍渡壁立赧駭迅復增步渠渠濃淑潰瀆洩滌深溪

衆濬湍湍瀆瀑租車壞覆而絕來崩石肆砢以前路盤湍在轉凌海
山頽擲蛟龍於大壑瀾沅演而雲迴三更戰鼓之登枕上萬派海音
之響層臺常竿不堪墮壁馬空復徊吁然後覩河雒之功而唏噓慕
哀曰厥德其濊溫公哉曷不俎豆持萬年之觴哉陽侯瘡痍威猶恐懼
于其廟貌孰東門之老婦望石駝而却走哉亦有游閒公子挾彈馳
騫乘鮮策肥飲饕食流輕死重氣逞慾薊侯實繁有徒跨府連州賦
詩咏懷登眺夷猶騷人失意志士埋憂看出雲之初月吸碧澗之長
劍引聲踏管竹洵旅酬或裂秋江之錢遂或送塞上之瑩篴點啜見
青龍而捲甲秦觀纜錦鷁而韻抽起萬里於展足橫百丈以泛艘徹
杜若之遼海飛如漢之僊舟馬退而釋國士履進而獲奇謀水涸則
計漢梁之詩天寒則歸龍鶴之儔曷不引人主於文申之宮擲杖而
明其香皇復使聞棋碁于方廣跨石梁以釋八風之愁橋倚橋橋倚

橋我將圖三株之松於天外莫問桃花叟孰分其仔細蓋大笑秦皇
之巡海右架滄津而空九寓之萬頭然後知建不拔者勢與空闔捍
大患者力與岸爭少保之功業善世宰堵之傑構文星吾謂事有虛
而有實亦一方而一周雁江之浮屠新泥塗以軒冕東西之缺陷簪
多寶於芒勾故西周之鼎盛人英物華男秀女貞敦詩服禮重德令
明公輔碩相哲穎修靈杖携屐過嶽峙淵渟聚似京雒貫比重城轂
擊雲動肩摩雷殷其下修額短項腹行脰鳴奮隼歸鳧狎鷺家鸛草
木天喬山川出雲地靈物衆不可勝倫勲功德之鐫自我光祿夫子
而余不忍復訊雒鵠之間但見枕席過師治湟偉觀筭子排木曳馬
載輶堞朋而環如耳而鉉螭然雲裝襟帶其園脰之所鑣脊之所負
或輻而塗或眇而附鐔于峪而建瓴其患此瓠中之路亂曰神哉豐
隆茲下濟風雨從之胡然締茂世之規弘仁惠伯禹仰嗟黃龍負陽

侯遁行瀾安步天挺斯人補天系地維圻兮虹梁繼山容水意黿鵲
嚳建華以西斗杓離此橋亘空千畧歲卿日尹月周天麗

岐山懷古賦

并序

王穀

平居懷古雅慕岐風筮仕服官愴心周道痛兵燹之相繼致民社
之邱墟萬姓流離一方憔悴荒城日落杳絕炊烟破壁風淒永無
人跡曩時名勝悉成瓦礫之場革代繁華盡委荆榛之藪撫今追
昔感慨係之登眺興懷泣然泣下淒涼觸目悲楚填喉爰此賦于
興衰實未裁乎工拙云爾

岐繇商祀天作大邦洪惟亶父肇此西壤地接梁山之脉星分鶉首
之鄉甲雍州之膏腴鍾柞棫之幽芳沃厓荼于原隰奠弧矢于陰陽
由是山呈厥瑞川貢其祥天柱巍聳太白鬱蒼汧流分導渭水環襄
世圖式廓王業寔昌誕興奕葉篤生文王化行南國澤溥西方風淳

俗厚士秀民龐頌孔邇而如戴歌既醉以不忘近質成于虞芮遠威
驚乎戎羗一時人文蔚起政教商煌鹿馴于囿鳳鳴于岡啟白魚之
先兆衍赤爵之流光遂有諸臣佐命多士思皇股肱締造夾輔胥匡
綿十五王之曆祚垂八百載之靈長休哉化國展矣名疆自運會有
隆替之異將世代爲興廢之常降及後季相率孔臧沿爲郡縣代有
紀綱樹兩京之屏翰鎮三輔之金湯矜雄盛者譜豐功于秦漢誇富
麗者揚嘉業於隋唐或擅六朝之美或推五代之良歷宋元而太平
屢邁迄明時而綏乂丕張廼爲述稽隆勝允誦吉康上也穆穆下也
穰穰家敦絃誦戶溢笙簧農服先疇之隴畝士食舊德之衣裳沐風
雲者輝聯甲第咏櫛比者積滿倉箱於是朱楹紛列繡闥成行百廛
鱗集萬井烟藏貨泉填市筐筐盈廂遂有張翠幃駕元驪披錦縠曳
明璫風流梁苑富貴荀香詩催金谷花照玉堂鶯啼寶榭燕語雕梁

蘭薰瑤鼎蓉遶紗牀琴協太和之奏歌傳卜夜之觴極賞心之樂事
騁快舉於康莊亦有青山寄傲白屋顒叩牙籤萬軸縹帙千緹芸封
鄴架卷擁曹倉或賭西山別墅或開北海幽房或飡霞於鶴嶼或烹
字於螢囊率彼都之葱珩咸結調于琳瑯四壁鼓鐘佐熙時之禮樂
千山花柳映瑞世之文章聿徵休美莫與頡頏不謂天收景慶妖隱
櫓槍萑苻蜂起刁斗塵揚兜鍪馳驟羽檄糜忙由是室家淪沒原畝
拋荒親知零落骨肉參商斷上林之喬梓拆合浦之鴛鴦奔人民於
燧鎬委陵谷於滄桑是以愁雲結而成陣淚雨注而如汪試向空城
凭眺不禁四顧悽惶人跡杳絕烟火微茫荆榛塞道瓦礫充墻風摧
敗棟月冷頽廊飢鳶晝伏野雉宵翔鶻夜泣兮青塚鳥暮號兮白楊
鷹隼搏兮署側狐兔穴兮舍傍盡棟烟消莫問繁華故址瑯臺冰化
誰留歌舞遺坊弔古徵奇山川黯淡尋幽選勝草木悽涼撫撫周原

想見當年富庶蕭蕭責子半成今日逃亡白骨山高僅保餘孽鳴
青燐夜遍空嗟猿首牂羊觸目流離誰爲給卹臨時之計相年飢饉
何從望汲都尉之糧露宿原棲影形共吊星零轉徙魂相相林芥
昏翳性度溪煙野月村墟滅沒驚看人跡橋霜野蹊囂囂舊事既難
問新愁其可當一望破垣埋舊碑殘墓絕蒸嘗無人對月不揮
涕到處思鄉皆斷腸痛草痛兮家破慘其慘兮兵燹可憐革代興亡
慨總付西風叫冤鶴重日空城寂寞兮逝水無聲原野冷落兮衰草
云黃時期平定兮無智牙璋重修樂土兮永慶城漿

關賦
并序

李楷

古人爲關之義多於郊圻司譴登戒出入禦暴而銷萌以守以戰
匪但義取於防也天下皆有關獨秦之西安以關中爲名遂稽周
漢隋唐之世建都以控萬邦門戶藩籬惟關是賴東有函關西有

隴關移函爲潼越隴爲散乃至子鄠沙海臨外域延遲周遭其不
有疆域之慮焉或乃以疆域爲遠近之程如記里鼓李于通之作
關賦以疏其旨其辭曰

有游奕公子者足有重跣衣垢結褊舌如星箕其言淳淳昧經邦之
遠猷惟瑣屑之爲敦以太史爲封殖及抱關之蟻巨請其詞而悅耳
如有裨于經綸適然遊于濱洋之野與辰放氏私之曰衣皮之人
櫛木茹皮以禦風霜絢髮鬪首以蔽靈雨存丹相之淳龐仍袖民于
隆古不星分於混茫誰不判於九土雖山阻而川隔量包容以并舉
無畛無畦何城何府故扶輿之大同亦先代之希覩後世不然百法
煩增各有其字關隘乃與款中疆而外拒寇元化而膠凝使通塗其
利多費之堪惜擊柝匪但乎康祿冗員尤滋乎營蟬權無抑末
志實還之登思飛渡而不得將棄繻而不能知鉉頭之總于

倚要害以憑陵俾鄰國其生心予嘆息而撫膺何不徹去乎贅疣之
鄙而示人以大道之弘乎辰放氏感眉而嘆曰惡乎可惡乎可予不
觀夫心乎膜以藏之腹以囊之咽喉呼吸肢體丰昌輔車唇齒元首
康強氣用其柔食用其剛斷堅韌之乾哉歎沆瀣之元漿頤地天之
冲和養祭衛之陰陽又不觀乎作宮者乎其丹其雘曰柰曰梁美輪
美負肯構肯堂實門戶之重寄時啟閉以爲康吾非忍以誑汝請徵
稽于亶父之遷疆廼立臯門臯門有仇廼立應門應門將將卽石室
之繩樞與穴居之巖墻誰其無需於鎖鑰惜升斗以愴惶是故詩人
之殷殷遠慮也旣建國都遂及關防每先事而預戒蓋有鑒於復隍
吾與汝遐想乎居重馭輕之勢以攷其內外相維之綱緬周人之制
法定山藪於職方惟其封建之繡錯斯以遙理乎要荒左周亭而右
召亭遂分布而相望循封濬之故蹟得山河之鬱蒼設習坎之險守

義巨鎮以雄張時則有若穀陵函谷設關斯當南輶輶而緱嶺北孟
門之太行扼郊鄩之定鼎輦洛邑之金湯路車不可以馳奔驥馱不
可以騰驤欽率律而如劔閣亦詰屈而號羊腸旌旗則有燦怒招拒
之五部戈鉞則有湛盧露陌之千鈹惟借此以省兩葉之斧柯詎有
惜乎升斗之微糧予不知乎盤古諒有鑒於夏商失其勢則代不遠
興成其險則國可遲亡是以平轍東依於晉鄩關右聿付於秦襄蕃
汧渭之驅馬成咸雍之虎狼或聖占於紫氣或賢隱而羣臧徵流沙
之西逝何國步之難匡逮嬴氏之益侈扼六國之背吭來相如連城
之璧納范雎入相之裝洵無以于季子亦納交于孟嘗雖譎資于徇
盜克亂正以鷄鳴鑑席捲之威始作兀蜀之阿房藉此時之建置非
一閭之將將武關曉關崕呀激昂屹少習以磊坳排蒼野以攷攢緬
堯師于丹水弔古堞于蠻鄉証張儀之六里嗤楚人之一僵蒲坂蒲

關河水洋洋固虞氏之京邑判芮野之圃場秦滅晉而一之蓋銷兵器而資墉坊昔魏侯之論德險美山河之固而一怠遑縱窺關之有人匪天命之靡常故赤帝子之隆準而連絕笑內應者之失措而徬徨三戶果楚人之桀桀傳檄又義問之煌煌微項重瞳之暴殄於一炬何沛亭長之約法於三章爰至韓信之木罍旣渡魏豹之疑陣斯戕旣入關之三道每引望而懷傷此則大漢之崖畧也奚重訊乎隋唐遊奕子曰處左者防其右都西者備其東云胡不襲其舊止長建邦畿于關中孰守其雌孰知其雄且外患之宜慮何先戒乎吾邦況古今之易姓奚守險之有終不擇人而選任難倖免於困窮徒縉雲氏之迂策將睢鳩氏之難通此剝民以奉軍旅者之所宜變計也盍取法乎良工於是欣然大笑拊其背而告之曰子言辯矣吾子不謾古人之有曆數者豈一隅之爲安哉嬪者皆冀州以爲都征誅則各

異其郊壇臺屢遷而衆蹙廼籲天於河干吾德尚有其代運八極環
轉於無端昭后稷公劉之令緒徵去邠邑岐之艱難開八百之寶祚
有禹貢之琅玕澤深廣而四被封碩大而且寬漢畧倣於豐鎬備赤
城之堅完前乎此爲雍爲翟爲塞維三秦之唇齒相倚後乎此京兆
馮翊扶風斯三輔之台曜密攢以潼束蔽而屏障庶其靖猊獮與共
驩若夫宜日趨洛而棄西文叔奮宛以回鑾帝不都於關右亦西望
乎嶢峴稽其防微之要旨蓋嘗遠卻夫蹂躪惑魏絳之不智悻貳師
之桓桓故漢文之粟紅而貫朽武帝之出塞而一搏或加恩於甌脫
或宣威於呼韓棘門細柳之赳赳羽林健兒之嘽嘽隋有宿衛之七
萃唐立府兵之重闌文昌列將相於星緯九野共藩屏於天盤其近
而爲關者則有藍田駱谷亘子午於南路涇陽焦獲依金鎖於同官
西達鳳翔則有斜谷大散諸葛亮之所出師而伐殘也隴關大震薛

防禦之所威外而戒隣也又有金牙之崢嶸青巖之屈蟠爲陳倉之
勝槩映吳嶽之雄巔乃入梁漢則有棧道之危削鷄頭之岩巒青石
之扼要陽平之聚團仙人之縹緲方山之幽寒或將入於劍閣或頻
臨於漢盪惟漢陽之址昭烈之所以破夏侯惇也饒峰之椒金師之
所以怖吳玠也苟忠孝之不渝境以人而不刊其闕虎頭馬嶺華陽
七盤鐵嶺清風匪第訾奸平涼有瓦亭焉隗囂之所以戍守唐肅之
所以牧馬靈武而盤桓也有六盤焉宣宗之所以成功吐蕃之所以
失利而蹢躅也至於蕭關扼據如石斯盤吳人遠憶詩歌攸嘆追英
主於漢武猶崆峒以遊觀藐通稍與大峽咸抱弩而負蘭輦昌則有
首陽之魄嶭大震之岌垣眄玉壘於蜀道思鄧艾之征鞍匪三巴之
無人得批郤而導隴臨洮則有積石鎖崑崙之下流金城壯名郡之
波瀾慶陽北地是惟彈丸不窟攸宅形勝莫殫驛馬象其衝突清平

消其揭竿延安鄜時宜設三單

原闕十二字

亦備

可汗永寧爲古今之餉道直羅存唐代之衣冠其遠而爲關者則有榆林爲鎮於勝州會寧接址於烏蘭若夫鎮遠勝金嘉谷石關玉門陽關之屬莫不處於極西之西極北之北且不周以岌岌護神臯之涓涓是故關中之域修於區寰我疆我理將無憂患甘泉猶厯於烽火校獵誰盡於豪獮惟王者之大無外經畧之具聿端其或忽鉅而重瑣瑣畧大而事芟芟辟之處於屋漏下筦上簞吾未見其可也諒非過於勞心之溥溥於是遊奕子其容有蹙其口囁嚅仰天而嘆曰先生之言關也可以銘可以箴可以法古而垂今余小子復何知夫蹄涔哉

史皇造字臺賦

并序

文龍軒

癸卯觀濤後五日至頡皇造字臺臺在昆明池左不知何時改爲

三會寺宇其上宇三楹外培塿數尺古槐婆娑其畔土人言下有
仙草見之者不死故罕遇是時亭午煎葭滿目鳬鷺凌波終南山
色襲人渭水晴光搖樹四眺者久之憶嘉州空階鳥跡之咏恍四
目頡皇來虛無縹緲間也斯臺爲古今第一文邱而相尋於荒烟
亂楚而莫問爰造斯賦以志勝遊

我欲蒐第一灝靈之菡萏於權輿兮障劫灰其茫茫極遠遊諸邃古
獵竒蹟乎大荒奮亥步而未遂聊驅馬於周疆爰按圖而求古壘真
憑几以數列觴爾余心兮擾擾於逐鹿之秦漢睥盤眎兮騷騷然奕
棋之隋唐時維藥館娑霓衣之舞濤門下白鷺之翔偕同人而選勝
指昆池以騰裝有臺墳起巋彼平蒼四圍告垓三字猶張皤皤焉垂
安國之柯郡萋萋兮高王孫之年芳拾級偃蹇極目周章西州賓告
予曰此頡皇造字臺也歲久而圯趾堙於漢變爲蓮界蕩爲狐塲軒

轍罕至鳥跡不彰零露漙文章之府蟬聲聒禮樂之堂臨風寥闕撫
影虛涼傷岑參之野寺攬宋玉之秋光慨余禁兮宕越悅彼美兮頤
長涇陽君畢然爲之不平紛鼓頰而琅琅曰聞之九州之隩實右我
雍隴坂豎其頭顱鎬京拓其心胷下園之以八水上杓之以七衡陰
陽屆東西之會子午協南北之中宜其胞無極之氣孕太初之精故
磊塊鬱勃蓓蕾而爲仰觀俯察之神鋒爾其珠湧壁卓也地籟自鳴
天網重暈倬章不綱素質初印邃皐解結盤古破悶日月賁其光華
鴻濛失其混沌文實蕃而粟飄幽情燭而鬼趣蛭蚪繪妍箴笱生韻
流爲墨池濫爲筆陳劍溪裁蹠中山東魏墳典垂芒邱索取聘兒孫
諸阜臣妾連艮五嶽失高四瀆減潤錫車指於群玉之巔剖符節於
琅環之峻七十二家之所不敢登萬有千歲之所無能問誰其颺此
匹夫標金簡玉冊之封我其爲是片語判赤縣神州之蘊豈謾張挾

天之辯空屑粲花之論於憑弔問者耶郇伯裔兄弟晉曰西風渭水
落葉長安如叟問影何人探環悼青松於香積訪白鶴於樓觀認折
戟於函谷尋膩粉於湯泉鳳崗寂寂麝麓漫漫幽徑古邨蔓草寒烟
游人不道樵子實繁澧澣之雲物邈如卷阿之車馬泯焉靡有此一
度之足音相與低徊指點於空階也奚有夫去天三百而壁地五千
何以峙之秦州卦臺魯國尼邱可以鼎足而爲三厥宇內之絕峯凌
巘崢嶸嶢嶢者吾嫌其無文咸螭侍若一卷於是晚風鼓浪斜日催
鞭悵葭蒼其莫溯倏倦飛而思還西州賓不覺粲然曰今日之游奇
曠過龍門之馬二客之讚開闢邁蘭臺之班頡皇可作同九錫夫斯
言

金牛峽賦

劉棻

伊維鴻濛旣闢兩儀判形山谷異位高下殊情或峻極於霄漢或深

入乎窅冥或險而有鳥道之號或邃而有鬼窟之稱幽潛沉鬱突兀
崢嶸固職方氏不能窮其數山海經不能悉其名者也若夫聳削壁
立竒峭天然隱蔽日月吞吐雲烟盡乾坤之奧妙成宇宙之大觀孰
如金牛峽之險亘古今而無前以彼夾峙兩山中通一線危石巉巖
竄搖目眩仰視則長空如帶驚翠巒之欲合環顧則崇墉如削疑赤
壁之互見哀行人兮地底羨松根兮天半極世境之酷烈兮已令人
却步而思返又誰爲設此永巷兮長逶迤而不斷當其一天霽色萬
里晴光亭亭日午倏爾輝煌撫清暉兮載路思白晝兮正長猶得挹
景物以流連任緩步而徜徉若乃重陰凝閉四野同雲蒼烟大霧沒
頂連根飛鳥悲鳴而逐伴哀猿長嘯以覓群寂寞兮中道迢遞兮前
村一舉足兮顛越一回望兮迷昏且爲歷崎嶇而上下縱呼籲兮難
聞至其方幸出谷旋驚陟巘羊腸迂迴龍門悠遠摩石蹬兮凌嶒俯

谿谷兮危棧乍屈乍伸或仰或俛急賈勇之弗遑敢屏息而定喘
白所以興嗟於上天之難而何有於九折之坂是蓋帝眷王公險設
重門一夫當關萬夫逡巡疇有德而當興遂授此凌霄之城關即在
大禹䟽鑿四乘八載胼胝經營濬海亦不能假神聖之威靈俾閭閻
之頓改維彼五丁其力伊何乃揮巨斧手劈嵯峨挾此移山平險之
能若使之束甲而橫戈應無難取秦人之疆域而爲蜀氏之山河區
區石牛糞金有幾乃以開山勤勞壯士卒啟釁而招亂致隕滅其宗
祀是固可爲貪得者之炯戒而蜀人之愚諒不至此吁嗟乎財役身
賤利令智昏古今同慨豈惟蜀人顧此關隘之危峻兮宜乎人之停
驂而迴輪奈何來往者之紛紛兮且如雨而如雲倘石牛在於今日
兮或不惜遄征而宵奔安可以舉世之通病兮獨誚讓乎蜀人

鳴咽泉賦

葉映榴

綏州夾園水大理而居文屏山屏其南循山而西爲雕山故以雕陰
名雕山之巔扶蘇塚在焉時有白虹出塚中去塚不五里有泉曰鳴
咽相傳爲扶蘇自裁處泉流斷續餘哀怨聲名之鳴咽甚稱已未夏
余較士至綏公事畢州守于君吳堡令李君邀余遊徘徊久之感慨
係焉于李二君屬余記而賦之余應之曰唯唯憶昌黎有言凡物不
得其平則鳴然鳴亦各異其或忠能折檻穎不處囊獨排群議抗論
朝堂其爲鳴也激昂其或才人扼腕思婦關情青衫雨淚紅袖吞聲
其爲鳴也淒清又或權佞嫉才忠良去國憂讒畏譏吟騷賦鵬其爲
鳴也哀蹙又或俠客愁深孤軍援絕易水悲歌龍沙飲血其爲鳴也
悲切而茲泉不然如簷之溜如石之瀝無瀑布之可懸無珠簾之可
織荷承露而乍傾雨將歇而猶滴水與石濡石爲水蝕噫嘻此其所
爲鳴咽者歟聽之泠泠挹之滢滢若泣者之中哽如歌者之不勝欲

鳴不可不鳴不能噫嘻此其所爲鳴咽者歟方其初授軍麾含情未
絕牽衣請留以止北轍於時可鳴也而不鳴洎乎祖龍已死奸臣矯
符真僞未辯上章理誣於義可鳴也而不鳴卽謂父不可違從容引
決一言而死以殛讒孽於情可鳴也而不鳴而乃聞命銜悲撫劍歛
泣引頸自裁流血成碧鬼歎鵲啼風雲變色焉怨臆於清泉激哀音
於白石閱萬古今千秋恍聞聲而於邑噫嘻此其所爲鳴咽者歟乃
爲之歌曰雕山截臬州城南岡巒森秀紛烟嵐吁嗟忠孝俱葬此公
子扶蘇與蒙恬蒙恬墓道沙飛雪扶蘇塚旁泉鳴咽塚上長虹白亘
天峽裏泉聲暗流血泣諫疏難悟君一麾北監長城軍沙坵片紙
倉卒下掣劍呼天天不聞公子既死李斯裂子嬰誅高秦亦滅忠魂
哀怨烏鳴湍萬古悲腸猶百結泉流觸石聲淙淙千巖萬壑吹陰風
颯如寒雨滴梧葉慙如敗壁吟秋蛩碎佩叢鈴共悽切珠凌斷澗自

摧折欲哭不哭時吞聲如與三十萬人訣我行聞此摧中腸長歌入
雲思激昂棄絕父子蔑忠孝無道未有如始皇嗚呼阿房一炬清渭
竭驪山銅泉泉亦洩牧童失火燒其陵惟有此泉流不絕

黃金峽賦

鄒容

伊銀河之澄景映天漢之靈波托涓涓於嶓冢匯淼淼於江沱趨東
海而朝宗廣南國而興歌方其滄浪未遠漾水既同噓噏汚雨吐納
褒龍姚墟之西壻河之東厥有天險鎖鑰漢中其地則武康雄鎮洋
川故州玉符徵瑞珠臺環流控秦楚以扼塞据鄖襄之上游穆王却
西征之轡赤帝紆東顧之憂典午設郡於木末拓拔置邑於巖頭山
則脉連秦嶺勢接巴陵行迴磅礴霧蔚雲蒸駱谷逶迤子午杳冥萬
螺疊翠千髻浮青水則支壑咸容細流罔拒馨椒艷莢柔蒲挺萍藻
淺潛深賁規溢矩文川武谷之歸遜水廉泉之聚羨澈底之澄清無

纖毫之塵縷夫何山勢促水流湍東斷瀨瀉重灘疑龍門闕竦而斤
削恍虎牙傑峙而戟攢詎藉丁開匪緣靈壁吮六之頭觸詔應龍
以尾畫紺峯截業而摩霄赭章差我而礙日懸崖巖俯而屏列絕岸
夾流而壁立漏天光於一線雲起還遮聖瀑布之千尋烟來如織亭
午徵射曠暉夜分畧窺蟾魄雖盛伏而陰寒縱晴明而晦黑怒濤風
鼓雷不夏而常鳴駭浪湯翻雪非冬而恒積遊女心悸於蒿荒交甫
魂銷而珮矢客星犯斗驚回八月之槎仙令朝天俏度雙飛之蜀若
乃蟠蘿蚪木密箐叢芒藤有鈎端纓絡竹有簾箭簞簞岩桂嶺松作
濟川之舟楫秋蘭春蕙韞幽谷之芬芳靈禽構虛捷獸騰荒群蛙股
接而飲澗孤狒唇翻而嘯岡色分魃魍角別麋麋豹濡霧以澤文麝
護臍而怜香獺數月而肝益熊應時而膽藏鳬鷺啞喋鴈鵝翔翔浮
鷗鳴於沙渚嗅驚鶉於山梁忘機狎其鷗鳥定偶羨夫鴛鴦鸚鵡吉

了應空谷之清響鷓鴣杜宇叫落月而悲傷爾其奇鱗異甲潛錦昭
妍揚鬐耀溜掉尾混淵既乘波而奮翅亦吹浪而飛涎鼉鼉於汨
際鯉暴腮於垠前出丙穴而嘉美麗槎頭而肥鮮或順時而偶至或
土產之自然復有胚瓊孕璜含琛藏璞晶珀斂輝球琳未琢斑瑁元
龜百朋鸞班皆希世之奇珍豈凡庸之能索惟是金河之水金水之
砂注於碧淵養厥黃芽揚邁浮槎經洶汰而呈彩蔓沿磯趾由披揀
而顯華百煉斯精銚鏐存鎔而成器一經魚鮒鼎鉉叶吉以傳家故
以黃金命名與麗水而同誇豈非媿雙南之珍重歷千古以休嘉也
哉然而天下之隱莫之與齊凡林羊角大小高低曰籠曰甕獺指蒿
溪二十四灘九十餘里下如隕石上如升梯不辨南北難指東西屈
曲駛逸目眩神迷假使澹臺問渡難不遇蛟而投壁縱令摩訶善沒
曷敢探珠於睡驪第見馮夷蠲忿而亦威罔象懺嗔而猶勇石尤不

惡而自阻封姨雖婉而仍猛天吳震盪以滔滔陽侯澎湃而洶洶誠
可貌灩澦而傲瞿塘易人鮐而輕惶恐也矧夫雲根浸底不測之深
石筍滿壑砢研成林似盆傾而益注如鼎沸而瓴淋觸激迴瀾鏤維
欲絕盤渦迅漩羽芥都沉漁人生長於煙波過此收綸猶必逡巡而
股栗商子往來於湖海抵茲停櫂不覺怔忡而戒心吾因思世路險
巇俯鑒崇園之侈人情翻覆應懲况穴之淫君子奉椿護之遺體奈
何侶蛟龍以相尋故寧居易而白壁慎毋行險於黃金

驪山賦

康乃心

瞻皇洲之漠漠兮經帝里之茫茫唯周秦之故苑兮繫唐漢之封疆
何嶢岼之綿亘兮橫豐鎬以回翔柏青青其似黛兮石砢砢而如霜
頰清渭之東流兮約滻灞其西行固祖龍之壽域兮伊文帝之崇岡
應星躔於井鬼兮鎮岐雍於金皇當山河之兩戒兮通雲漢於天章

昔驪戎之所據兮實晉獻之攸荒
羌烽火之作戲兮俾宗周以喪亡
豈層巒之秀麗兮偏遊冶以爲臧
抑列雄於上國兮或亦都人高士
之所彷徨爾其連峰斷嶺暮雨朝
烟層厓疊嶂花鵲草芊岑名金斧
水出溫泉風鳴林錯鳥語石妍平
眎長樂之苑遠臨杜曲之川左龍
首以還顧右桃塞之當前既可觴
而可詠亦宜隱而宜仙將褰裳乎
竟日欲策杖而流連探遺跡於神
母訪疑義於李臺冀握機其可授
識木火之真傳極遊目於遐表採
靈芝於絕巔何壑峒之浩渺無軒
帝之長年已而赤日將微夕陽欲
下搔首中天悲生四野感情艷兮
若何寄興亡於頌雅歎零淚兮沾
衣或浩歌而盈把睇睇嶺之牛羊
愴九變之鐵馬嗟百戰兮爲雄不
侮繆而凌寡胡諸孫兮繼起乃莫
庇夫廟社旣龍飛於興慶復燕啄
乎華清醉朝陽之第一或並輦而
同行陟朝元之高閣顧繡嶺而縱
橫浴鴛鴦於別殿訂牛女之私盟

慨人天之會合時泣下夫長生矧其紅塵一騎驚荔子之飛來綠樹
重簷怪雪花之未落縹緲驪宮兮遙聞仙樂蒼茫豐市兮近見行人
悵曲江其已去開偃月之方新固將經時經歲以夕以朝宴瑤池而
永好逢群玉以久要妃子海棠歡齊乎金母三郎玉笛壽比夫王喬
孰知恩波方承乎太液胡馬忽動於燕山催花羯鼓淵淵坎坎兮打
開劒閣霓裳羽衣翩翩裊裊兮舞破潼關天半峨眉鳳輦之匆匆方
下雲中紫閣鸞車之噦噦不還霜殿紅妝兮長辭金鏡馬嵬青草兮
遂塋玉環慘石甕於殘陽咽湯泉之半灣野草淒迷以長綠宮花寂
寞而無顏遡開寶之理亂知帝位之維艱苟慎終其如始奚難辨乎
忠姦豈茲山兮亡國寶不戒夫真頑徒叩頭兮泣諫空流恨以潺湲
步林椒兮太息每惆悵夫雲鬢聊上下兮千古託規諷於行間亂曰
於戲哉雄連兩華壯坤輿兮秀接終南麗黃居兮吐納風雲元始墟

今祈靈太乙授鴻書今烽臺繡嶺禾黍餘今周道唐宮怨樵漁今億
萬斯年御世膺圖夕陽流水顧此嗟峨尚取鑑於古初兮

